

Malueng teltelnga ako Pita i wat i

1 Pita

Ritetong nge a 1 Pita

Pita i voth a rem pomnga ako i apet i ve ini “Babilon” ma i wat malueng ake. (5:13) Na toko pelie olemi ve i ri nge Babilon nunganga ako i voth a epee a Mesopotemia. Ave toko pelie olemi ve, Pita i ri riong agelalnga ako i apet rem ako i voth nge ini a “Babilon”, eneke i vual nge vothung kerenga. Na olemi ve, rem nunganga i voth nge ini a Rom eve Jerusalem eve rem omole ako ru a epee a Isip. Pita i pasong malueng ake nge areko o lo vra nge ole pen ma or ini loomere nge pen pelie, (1:1) ako Kristenre o el matheong nge. Pita i sis ve aro i paengeng Krai ile tokokoe areko o el kerengaing nge toko kerengare. (1:6; 2:8-26; 3:13-17; 4:6-19) Na Pita i ri ve, matheong areken o velpoltun it mo aro i tongporum ler lemioong mo i pathengpot ako ve, ler lemioonga aken i nunganga. (1:6-7) Pita i pator it ve, aro te panes vothung sivenga ako Jisas i oma i, nge ako i el sisising venen aken. (1:3-5; 1:13; 4:7) It ini a God ile tokokoere, (2:9-10) maken aro te mimi ranga ve ako it ini a God ile, na aro ve matheong i velpoltun it, aro te oma inga vothung sivenga, naro te mit engeng nge ler lemioong. Aken ini riong aolonga ako i voth a malueng ake lemi.

**It ini a God ilengare, mako te
oma vothung sivenga, naro te**

men sial nge ur sivesivengare ako aro te el i

(Vonge 1:1-2:10)

¹ Tho a Pita, tho ini a Jisas Kraiss ile pakeke.

Tho wat malueng ake a thomu areko God i ateal thomu ve ini ile, na o lo vra nge lomu pen a Israel na o voth ini loomere a epee a Pontus, Galesia, Kapadosia, Esia na Bitinia.

² Na ar Vovo a God i ateal thomu, ranga ve ako nomenga ilemi ve aro i oma i, na i pavelpol thomu ini toko riringare, ako nge Ioni Riringa mo aro thomu o nongal a Jisas Kraiss, naro ia mla i tiptip leltun thomu mo aro i pavthopot thomu nge lomu vothung kerenga.

Na tho nong ve aro God ile themosaling na ile lemi moring aro i vual rintet a thomu nge.

Ler men sialing nge mimiong Pen a Urvet anga i paengeng it nge matheong potunnga.

³ Aro te risea a God ako ini ar Pomnga a Jisas Kraiss Itema, eneke i themosal rintet it, mako i sung mimiong ponganga a it nge, aken te men sial ol nge ur areko aro i sungu i a it nge ako aro ile vusonga avele. Naro ile vusonga avele, eneke Jisas Kraiss i los werera nge rinong.

⁴ Na i themosal it venen aken mo aro te el ol ile ur sivesivenga areken ako i pango tetal i nge it ako a Pen a Urvet. Na ur areken, i pavurvur aro ur e avele i pakerenga ir, na ur e avele aro i paakop ir, na ile sivengaing aro i vus avele.

⁵ Na nge lomu lemioong, God i paseral thomu nge ile engenging mo aro thomu o el sele

mimiong ako aro i pamimi ol tokokoere nge. Na i monsi lale ve aro i pango pat ol ile pamimiong aken nge nang le vusonga.

⁶ Na thomu o risea rintet nge ur areken. Aveto matheong pelekpolngare ako thomu o el i ponange, na lelle inga atike na o el sisisong nge, kene i pavurvur aro i pakerenga lomu riseaing aken avele.

⁷ Na tongporumong areken o velpoltun thomu mo i pathengal ako ve, lomu lemioong i nunganga. Na o tongporum mun gol venen aken ako o paeso i a won sesenga nge mo i pavelpol ile sivengaing. Aveto nge a God itheki, lomu lemioong i sivenga rintet nge gol ako aro i voth palolo avele. Na tongporumong aro i velpol a thomu nge venen aken mo lomu lemioong aro i mit engeng, aken nge nang ako Jisas Krai aro i velpol pat ol, aro i risea na i paesa thomu nge lomu lemioong aken, na ia malmaling a urvet aro i sung mun i a thomu nge.

⁸ Na thomu o thepol i rongan, aveto rongan omu sagu i, na ponange mun ake rongan thomu o thepol i avele, aveto rongan lomumuo a i nge, mako thomu o vual rintet nge riseaing, na riseaing aken o pavurvur aro o patongrum i nge ur ulue anga e avele.

⁹ Na thomu o risea venen aken, eneke ponange ol ake thomu o el ol lomu lemioong monnga ako ini lomu lemioong motunga ako ini pamimingo-mua.

¹⁰ Na God ile riong elnga areko o ritet nge pamimiong aken ako aro i sungu i a thomu nge ako nge ile themosaling, na o kathu katha rintet

mun nge pamimiong aken ile velpoling aro i vava ako a God ile erere nge.

¹¹ Na nomenga Krai Ioni ako i voth a olemi, kene i ritet tel a mukaling nge sisisono ako aro Krai aro i el i panen, na nge ia malmaling a urvet ako aro i el mun i a rumongaling me. Na olemi rumu ruma Oni Riringa ile riong aken nge a Krai ile velpoling, naro i velpol penva.

¹² Na God i pango pat i a or nge ve, ur areko osivenga o ritet nge, kene aro i velpol nge nang ako o mimi nge avele, aveto aro i velpol ol a thomu nge. Na ranga ve ponange ol i velpol ol a thomu nge lale, nge ako o panongpol thomu nge Panongpolong Sivenga ako nge Oni Riringa ile engenging ako God i pakeu i a Pen a Urvet me. Na ur ako o ritet i a thomu nge lale, ensel munre o sis ve aro olemi mire nge.

God i leng it ve aro ler mimiong aro i riri a itheki.

¹³ Maken aro thomu o naktet senu lomu lemi rumong, na o theal senu lomu mimiong. Na o men sial ol inga nge pamimiong ako Jisas Krai aro i sungu i a thomu nge, ako nge ile themosaling, nge ako aro i velpol pat ol.

¹⁴ Na nomenga lomumu mire nge a God avele, na o panes inga vothung kerenga, aveto ponange thomu ini a God itutun areko o nongal ile riong, na o mothong tova o panes werer ol lomu lemi rumong kerenga areken.

¹⁵ Aveto lomu vothung alavusnga ako o oma i, aro i riri a God itheki, ranga ve ako God ienga ako i ateal thomu mo ini ile kene i riri.

¹⁶ Eneke God ile riong i ri vene,

“Aro thomu o velpol ini toko riringa,
eneke tho ini God riringa.”
11:44-45; 19:2; 20:7

Wok Pris

Olonger ako God i ol werer it nge kene i roro rintet.

¹⁷ Na nge ako thomu o nong a God nge, o apet i ve ini, Vovo. Na ini a God ako aro i avrum toko alavusnga ole vothung, na ile avrumong aken i vur e pel inga, naro i panes inga vothung ako toko omole omole o oma i. Aken aro thomu o mimi tomo nge lomu ngeipong nge i, nge lomu mimiong ol ake ru a ulue, ako ranga ve o voth ini longre nge pen aken.

¹⁸ Naro o mimi venen aken, eneke lomumu mire mun ako ve, God i ol wererpot thomu nge lomu mimiong ako o elespot i a titovumuere nge ako imonnga avele. Na i ol thomu nge ur ako i kerenga virial ranga ve ini gol na silva, kene avele,

¹⁹ aveto i ol thomu nge ur ako iolonga i roro rintet naro i penthal avele, ako ini a Krai ia mla. Na Krai i ranga ve ini sipsip itun ako ur kerenga e avele i teo a i nge, ako o so rin i mo o oma ole sungong a God nge.

²⁰ Na God i pamen ulue rongan na i ateal a Krai lale ve aro i rin venen aken, aveto nge nang patopalalnga areke te voth nge ponange, God i pango pat a Krai lale ve aro i opoal thomu.

²¹ Na nge a Krai ile omaing aken, lomu lemioong i voth ol nge a God ako i palos werera i nge rinong, na i sung malmaling a urvet a i nge. Maken lomu lemioong i engeng ol nge a God, na o men sial ol nge ur ako God i kin ile riong nge lale.

Aro ar sagu rintet pel.

²² Na lomu mimiong i riri a God itheki lale, eneke thomu o nongal a God ile riong nunganga nge a Jisas lale, mako o pavurvur aro o sung asaguong nunganga a toko lemioongare nge, maken aro omu sagu pel tomo nge lomumu alavusnga.

²³ Eneke thomu o el mimiong ponganga lale. Na ini mimiong ako titomomue ulue angare o pavelpol i avele, eneke mimiong aken kene aro i voth palolo avele. Ini mimiong ako aro ile vusonga avele, eneke God ile riong ako i sung mimiong naro ile vusonga avele, kene i pavelpol i a thomu nge.

²⁴ Na riong aken i nunganga, eneke God ile riong i ri vene,

“Toko alavusnga o ranga ve ini pilil
 ako nang i in i ma i voth palolo avele.
 Na tokokoere oa malmaling ile sivengaing
 i ranga ve ini won punpolnga
 ako i punpolpot inga, nako i movurpot
 werer.

²⁵ Aveto Toko Pomnga ile riong i voth,
 naro ile vusonga avele.” *Aisaia 40:6-8*

Na riong ako God ile riong ake i ri nge kene ini Panongpolong Sivenga ako o panongpol thomu nge lale.

2

¹ Na thomu o el mimiong ponganga lale, maken aro thomu o modop vothung kerenga elonga ranga ve ini le apaltetong alavusnga, na sive-neaing nge vothung sivenga, na ni silaling nge

areko ole ur elonga pom, na ri moluplupong alavusnga.

² Naro thomu o betet nge a God ile riong inga elnga ranga ve ini povothvoth areko o maneu ol or, ma oa pun rintet nge susuong, mo aro thomu o motu nge lomu mimiong ponganga, i mulal nge nang ako aro God i pamimi selele ol thomu nge.

³ Naro thomu o oma venen aken, eneke thomu o tongporum a Toko Pomnga lale, ma i sivenga ol a thomu nge.

Toko lemioongare o ranga ve ini um ako God i aria ile vel nge.

⁴ Na nge ako thomu o es a Toko Pomnga nge, o es a i nge ranga ve ako ini um ako mimiong i voth nge ako tokokoere o siv lelpot i, aveto a God itheki ini um a urvet ako iolonga i roro rintet, mako i ateal i ve aro i aria ile vel nge.

⁵ Na nge ako o es a i nge venen aken, thomu mun o ranga ve ini umre ako mimiong i voth nge, na God i veliloalo thomu mo Ioni i aria ile lotuonga a vel nge thomu. Na i oma venen aken mo aro thomu o velpol ranga ve ini ile pris riringare mo o sung lomu sungong ako Oni Riringa i pavelpol i a lomumu nge. Na God ilemi sivenga nge lomu sungong areken, eneke thomu o teo a Jisas Krai nge.

⁶ Na ur areken i nunganga, eneke God ile riong i ri vene:

“O nongpol! Tho ateal nepes omole lale,

na i ranga ve ini um a urvet

ako i olonga i roro rintet

na i toth ako aro tho pangoa i a tete a Saion

ranga ve ini um ako i paengeng vel ile
mitong,

ranga ve ini wovek sapatanga.

Na toko ako ilemio nge i,

aro i el le maraing nge i avele.” *Aisaia 28:16*

⁷ I nunganga ako God i paroro thomu areko lomumuo nge a Jisas ako ini um a urvet aken. Aveto nge areko olemio nge i avele, God ile erere i ri vene:

“Na um ako vel aringare o siv lelpot i,

i kene i velpol ini um ako i paengeng vel ile
mitong,

ranga ve ini wovek sapatanga,

ma i mukal ol nge um alavusnga areken.”

Buk Song 118:22

⁸ Na God ile erere i ri mun ve:

“Ini um ako ini tokokoere oeve le titonga,

na ini ur ako aro i pamatu tokokoere.” *Aisaia 8:14*

Na o matu ranga ve ako God i ateal or nge, eneke o nongal a God ile riong avele.

⁹ Aveto God i ateal thomu ve aro ini ile tokokoere, na thomu ini ler nepes a God ile prisre, na thomu ini tokokoe areko o riri, ako God isivenga i lengpot thomu mo ini ile. Na i oma venen aken mo aro thomu o panongpol nge ur sivesivenga areko i oma i, ako te risea i nge, nge ako i lengpot thomu a mideng lemi me, ma i paeso thomu nge ile pen lalanga ako i sivenga rintet.

¹⁰ Nomenga thomu ini a God ile tokokoere avele, aveto ponange thomu ini ile tokokoe ol re. Nomenga thomu o el vet a God ile themosaling

avele, aveto ponange thomu o el ol a God ile themosaling.

Aro ler esong i vengveng inga a toko alavusnga otheke

(Vonge 2:11–3:22)

Ler vothung aro i sivenga.

¹¹ Titeik sivengare, thomu o voth ini longre ake ru a ulue, make tho pator thomu ve aro o mothong tova o panes lemi rumong kerenga ako i mita a lomumu, na i pun tomo nge lomu lemi rumong sivenga.

¹² Na i nunganga ako areko or ini toko lemioongare avele, o teltun polpol omu nge vothung kerenga omanga, aveto a oa lemimi aro lomu vothung aro i vengveng inga, aken aro o thepol lomu vothung sivenga aken, naro o risea a God, nge nang ako aro i lo werer nge me.

Aro te voth a mukalingare osa thewo.

¹³ Aro thomu o voth a toko mukalinga ulue angare osa thewo, eneke Toko Pomnga i sis ve aro thomu o oma venen aken. Naro thomu o voth a nepes mukalinga ako ini nepes alavusnga oa pomnga isa thewo.

¹⁴ Naro thomu o voth mun a ile gavman a mukalingare osa thewo, eneke i pake or mo aro o paomelal areko o oma vothung kerenga, na o risea mun areko o oma vothung sivenga.

¹⁵ Naro thomu o voth a osa thewo venen aken, eneke God i sis ve aro lomu vothung sivenga aro i paporengu tokokoere ole riong pelekpolnga areko olemi otun polpol thomu nge.

¹⁶ Aro thomu o mimi ranga ve ako o vthopot nge patorong iteltunnga, aveto o mothong tova o seltunu vothung kerenga omanga nge lomu vthopotong aken. Avele! Aro thomu o mimi inga ranga ve ini a God ile umongare ako o panes inga ikei.

¹⁷ Aro thomu o papomnga toko alavusnga. Naro omu sagu titeumu lemioongare. Naro o papomnga rintet a God tomo nge ngeipong. Naro o papomnga mun lomu nepesre oa pomnga.

Toko um polpolongare aro o voth a otokoningare osa thewo.

¹⁸ Na thomu toko um polpolongare, aro thomu o paesu sivengomu a tokoningomure osa thewo, naro o papomnga or alavusnga. Naro o oma venen aken inga nge areko o oma vothung sivenga, na o themosal thomu inga, kene avele, aveto aro o oma venen aken mun nge areko o pamen kerere polpol thomu.

¹⁹ Eneke God ilemi sivenga inga nge lomu vothung ako thomu o panes inga a God ilemi, na o potun inga matheong na sisisonng ako tokoningomure o oma polpol i a thomu nge.

²⁰ Na aro ve omu e i oma vothung kerenga e, na i el inga sisisonng ako o siso i nge, aro lomum vava nge aken? Aro God ilemi sivenga nge? Avele! Aveto aro ve thomu o el sisisonng nge vothung sivenga omanga, na o el inga aken, aken God ilemi sivenga inga nge aken.

²¹ Na God i lengpot thomu mo aro o panes vothung aken, eneke Krais mun i el sisisonng nge opoalngomu. Na i oma venen aken mo aro i

pathengal thomu nge sovengalo ako aro thomu o panesrum i nge.

²² Na i oma vothung kerenga e avele,
na riong le apaltetonga e avele i espot mun a iwo. *Aisaia 53:9*

²³ Na nge ako o oma riong kerenga a i nge, i olal werer riong kerenga a or nge avele. Na nge ako i el sisising a or nge, i ria vet ve, aro i paolal werer i a or nge avele. Aveto i sungu inga ur alavusnga a God imeni ako i avrum vengveng tokokoere ole vothung.

²⁴ Na isivenga ini peti i mon a won ngoronga nge, eneke i el ler vothung kerenga olalnga. Na nge aken, i pavurvur aro te mothong selele vothung kerenga omanga ranga ve ini toko rinonga, naro te panes inga vothung vengvenga tomo nge ler mimiong alavusnga. Na ile omaing i vene re aken na i pamimi thomu ako nge sisoing ako i el i.

²⁵ Na i oma venen aken nge thomu, eneke nomenga thomu o leklek ranga ve ini sipsipre ako o nongal otokoningare okei avele, aveto ponange thomu o eksing, na o panes ol inga toko ako i theal lomu mimiong ranga ve ini sipsipre othealnga.

3

Sengre aro o voth a oewoere osa thewo.

¹ Na i vene mun nge thomu seng peangere, aro thomu o voth a ewomuere osa thewo mo aro ve oa pelie olemio nge a God ile riong avele, na aro ve thomu o sung mun riong pelie a or nge avele, ur e avele, aro lomu vothung aken inga aro i oma or mo olemio nge a Toko Pomnga,

² eneke aro o thepol lomu vothung riringa tomo mun nge lomu vothung nongalnga.

³ Na o mothong tova omu malmaling ini lalanga anga, ranga ve ini pounga thoing galelgalelnga, na nanaing ako ini gol nananga, na teunong sivesivengare teunnga mun.

⁴ Aveto i sivenga ako aro omu malmaling ini lomumu anga ako i penthal avele, ranga ve ini vothung lemi mosing tomo nge lemi moring. Na malmaling ako i venen aken, iolonga i roro rintet a God itheki.

⁵ Na ini vothung ako seng nomengangare ako o riri na olemio nge a God ve aro i panes ile riong kinnga, kene o panes i. Na o pamalmaal osivenga nge ako o paesu or a oewoere osa thewo.

⁶ Na Sara i venen aken, eneke i nongal a Abraham ikei, na i apet i ve ini ia pomnga. Na thomu ini itutun sengengaere, tova ve lomu vothung i vengveng, na ngeipong ile mong thomu avele.

Tokokoere aro o theal senu oewoere.

⁷ Na i vene mun nge thomu toko peangere, aro thomu o pamen senu ewomu sengengaere ranga ve ako God i sung mire a thomu nge. Naro o theal senu or ranga ve ako ole engenging i posnga nge lomu engenging, eneke God i themosal mun or, naro o el mun ile sungong tomo nge thomu ako ini mimiong ako aro ile vusonga avele. Naro thomu o oma venen aken mo aro ur e avele aro i mit roal lomu nongong.

Aro te pamen senu pel.

⁸ Na lek riong patopalalnga nge ur areken i vene: Aro thomu alavusnga aro lomumu omole

ol inga, naro lomumu esal pel, naro omu sagu pel ranga ve ako titeumu pel, naro o sung lomumu alavusnga nge tokokoere oopoalnga, naro o paruru mun sivengomu.

⁹ Na o mothong tova o olal werer vothung kerenga nge areko o oma vothung kerenga a thomu nge. Na o mothong mun tova o olal werer ri moluplupong nge areko o ri moluplup thomu. Aveto aro thomu o olal werer i a or nge, nge lomu riong ako o nong a God nge ve aro i oma senu nge or, eneke God i ateal thomu ve aro o oma venen aken mo aro God i oma senu nge thomu.

¹⁰ Naro thomu oma venen aken, eneke God ile riong i ri vene:

“Aro ve toko e i sis ve aro i el mimiong sivenga
na i mimi nge nang sivenga,
aro riong kerenga e avele,
na le apaltetong e avele mun
aro i espot a iwo.

¹¹ Naro i lel ikime nge vothung kerenga omanga,
naro i panes inga vothung vengvenga.
Naro i betet ve aro i men senu tomo nge toko alavusnga.

¹² Eneke Toko Pomnga i theal senu nge
areko ole vothung i vengveng,
na i ta itelnga nge ole nongong.
Aveto Toko Pomnga i lel ikime nge
areko o oma vothung kerenga.” *Buk Song*
34:12-16

*Aro te el inga sisisong nge ler vothung sivenga
ranga ve ako Krai i el i.*

¹³ Na anga aro i pakerenga thomu tova thomu o betet inga nge vothung sivenga omanga, e?

¹⁴ Aveto aro sapase thomu tova ve, thomu o el sisisong nge lomu vothung vengvenga. “O mothong tova o ngeip nge ole vothung ako o pangeip thomu nge. Na o mothong tova lomumu kerere.” *

¹⁵ Aveto a lomumu aro o pamena a Krais roro mo o papomnga inga ienga ve aro ini omu Pomnga. Na opisleonga aro thomu o monsi ve aro o olal tokokoere ole ninong nge lomu men sialing nge a God ile ur sivesivengare.

¹⁶ Aveto nge lomu riong olalnga aken, aro o papomnga or, na o ri riong mosnga a or nge. Naro o oma inga ur ako i sivenga mo ur e avele i voth a lomumu, mo aro ve tokokoere o oma riong kerenga nge lomu vothung sivenga ako o panes a Krais nge, aken aro ole mara nge ole riong kerenga aken.

¹⁷ Naro thomu o mimi venen aken, eneke aro ve God i sis ve aro thomu o el sisisong, i sivenga ako aro o el sisisong nge lomu vothung sivenga omanga, eneke ile sungong e avele i voth nge sisisong ako thomu o el i nge lomu vothung kerenga.

¹⁸ Na i sivenga ako aro thomu o el sisisong nge lomu vothung sivenga omanga, eneke Krais ako ini toko vengvenga i el mun sisisong nge areko or ini toko vengvenga avele oopoalnga, na i rin leltun ole vothung kerenga. Na i rin pa omole inga mo i opoal toko alavusnga mo o pavurvur ako aro o es a God nge. Na nge ako o so rin i, ma

* **3:14:** Aisaia 8:12

ini peti inga i rin, aveto ioni rongan i mimi, na i el mimiong ponganga.

¹⁹ Na nge sovengalo aken, i es mo i panongpol Waliare ole, ako o voth a paomelalinga a pen.

²⁰ Ini areko o nong sirik nomenga nge ako God i paninal or ve aro o eksing. Na ile paninaling aken i voth nge nang areko Noa i oma imot aolonga nge. Na toko inga or limme inga ako o el mimiong a imot lemi na o monu mona a thei i pavurvur nge ako thei aken i pamimi or.

²¹ Na thei aken ini paatealing nge paninuong ako i pamimi ol thomu ako nge a Jisas Krais ile los wereraing. Na ini numu peti akopnga paut rirpotnga avele, ini lomu riong kinnga ako thomu o oma i a God nge ve aro o oma inga ur ako i sivenga mo ur e avele aro i eso ol a lomumu.

²² Na Krais ini toko ako i esa a Pen a Urvet lale, na i men ol a God imeni sivenga nge anga, nge wop ako o papompom tokokoere nge. Na enselre, na tamatare, na ur alavusnga ako ole engenging i voth, kene o voth ol ako a isa thewo.

Tongporumong aolonga na sisiong aro i velpoltun toko lemioongare

4

(Vonge 4:1–5:14)

Aro te lel kimer nge vothung ulue angare.

¹ Na Krais i el sisiong nge ini peti, aken aro thomu o el mun ile lemi rumong aken, mo i monsi thomu nge sisiong elnga. Eneke toko e ako i el

sisisong nge ini peti lale, aken i pavirus ol vothung kerenga ile engenging a i nge lale.

² Na nge ile mimiong ake ru a ulue, aro i panes ol inga vothung ako God i sis ve aro i oma i, naro i panes ol vothung ulue anga ako i mita a ilemi me, kene avele.

³ Eneke i palolo rintet lale nge lomu mimiong ako thomu o panes vothung ulue anga ako areko or ini a God ile tokokoere avele o oma i, ranga ve ako ole mimiong i vual nge toko na seng aomnga, tomo nge vothung pelekpolngare omanga, na theki le roroing, na o thin rinrin thei engenga evelelnga, na o thinu thina thei engenga nge saal aolongaere ako vothung kerenga pulua i voth a lemi, na ole lotualing nge avalare i kerenga selele, na lomu vothung areken ru o modopu i lale aro i pavurvur ol venen aken ol.

⁴ Na o kukuk ako thomu o supo tomo ol avele nge ole vothung ako i ranga ve ini mekerem wengare ole, mako o oma riong kerenga pulua nge thomu.

⁵ Aveto aro o mit nge riong nge ole vothung aken, na riong nongpolnga ako i monsi lale ve aro i avrum toko rinrinongare na toko mimingare ole riong, aro i oma or mo o pamilempot tepun vava ako o oma ole vothung areken.

⁶ Na tepun ako Kraisi esu a Wali na i panongpol Panongpolong Sivenga nge areko o rin lale kene i vene: Nomenga areko olemio nge a God, toko ulue angare o teltun polpol oa, ma o rin mun ranga ve ini toko neneanga alavusnga, aveto o nongpol Panongpolong Sivenga ma olemio mun nge mo i pavurvur aro ooni aro o mimi ol tomo

nge a God.

Aro te um senu tomo nge sungong ako God i sungu i a it nge.

⁷ Na ur alavusnga ile vusong i toth me lale, maken aro lomu lemi rumong aro i nine, na o theal senu lomu mimiong mo i pavurvur aro o nong a God nge.

⁸ Na vothung ako i mukal nge vothung alavusnga i vene: Aro omu sagu rintet pel, eneke vothung ako nge asaguong i seltun vothung kerenga puluanga.

⁹ Naro o nongpoo pel, na o mothong tova lomumu a riong nge.

¹⁰ Naro thomu o opoal pel sivengomu nge sungong rel relngare ako thomu omole omole o el i nge a God ile themosaling, na o theal senu or evelelnga ranga ve ini ile umonga sivengare.

¹¹ Na aro ve toko e i el sungong nge riong panongpolnga, aro i panongpol vengveng inga riong ako i es a God nge me. Na aro ve toko e i el sungong nge tokokoere oopoalnga, aro i oma i tomo nge engenging ako God i sungu i a i nge. Naro thomu o oma venen aken mo aro tokokoere o thepol lomu sungong areken, na o risea a God ako nge a Jisas Kraais. Na ini toko ako i el malmaling a urvet na engenging ako aro ile vusonga avele. I nunganga.

Te mothong tova ler mara tova te el sisisong nge ler lemioong nge a Kraais.

¹² Na titeik sivengare, o mothong tova o kukuk nge sisisong velvelnga ako i tongporum thomu,

ranga ve ako ini ur ponganga ako i velpoltun thomu.

¹³ Aveto aro lomumu i sivenga inga ako thomu o el mun sisisong ranga ve ako Krai*s* i el i, na lomu voth vosaling aro i panes tomo mun sisisong aken mo aro o vual rintet nge voth vosaling nge nang ako aro God i pavelpol pat ol a Krai*s* ia malmaling a urvet.

¹⁴ Na aro ve tokokoere o ri tangatun nge thomu, eneke thomu o panes a Krai*s*, sapase thomu, eneke God Ioni na ia malmaling a urvet i seltun thomu.

¹⁵ Na o mothong tova o pavelpol sisisong nge sivengomu nge lomu vothung ako ranga ve ini toko so rinnga, na toko kemonga, na patorong avsanga, eve o pavothalo tokokoere nge ole umong.

¹⁶ Aveto aro ve thomu o el sisisong nge ako thomu ini a Krai*s* ile tokokoere, o mothong tova lomu mara nge, aveto aro thomu o ri sivengaing a God nge ako Krai*s* Iion i sop a thomu nge.

¹⁷ Eneke nang ako God ile tokokoere o mit nge riong i pate*a* lale. Na aro ve i pate*a* i a it nge ako te el sisisong a tokokoere nge, aro ile vusong i vava ol nge areko o avsa a God ile Panongpolong Sivenga, e?

¹⁸ Na i ranga ve ako God ile erere i ri nge ako i ri vene:

“Na aro ve i klip rintet nge toko vengvengare
ve aro o el ole pamimiong a God nge,
aro i vava nge areko o lel okime nge a God
na ole vothung kerenga, e?” *Gutpela*
Sindaun 11:31

¹⁹ Maken areko o el sisisong ranga ve ako God i sis ve aro o el i, aro o kis inga vothung sivenga omanga, naro o sung osivenga a God imeni ako ini Patenger ako i theal senu or ranga ve ako i kin ile riong nge lale.

5

Lotu a mukalinga areko ole lemioong i motu aro o theal senu a God ile tokokoere.

¹ Na thomu lotu a mukalinga areko lomu lemioong i motu, tho ini lotu a mukalinga mun ranga ve ini thomu, na tho ini toko ako tho thepol sisisong ako Krai i el i, na tho panongpol nge, na tho ini toko ako aro tho supo tomo mun nge areko aro o el mun ia malmaling a urvet ako aro i velpol pat ol panen, make tho pator engeng thomu lotu a mukalingare

² ve aro o theal senu a God ile tokokoe areko i pathealu thomu nge or, ranga ve ini sipsip thealnga i theal ile sipsipre. Naro thomu o theal senu or, eneke lomumu i sivenga nge omanga ranga ve ako God i sis ve aro thomu o oma i. Na o mothong tova o oma i ranga ve ako toko i pakealal thomu nge. Na o mothong mun tova o oma i ranga ve ako lomumu i voth inga nge umtun elnga, aveto aro o oma i, eneke lomumu i engeng nge omaing aken omanga.

³ Na o mothong tova o papomnga sivengomu a otheke mo o pakeu pakea tokokoe areko God i pathealu thomu nge, aveto aro o pathengal lomu vothung vengvenga a or nge mo i pavurvur ako aro o panes i.

4 Na aro ve thomu o oma venen aken, i pavurvur ako la Jisas ako ini Sipsip Thealngare Oa Pomnga i velpol pat ol, aro thomu o el olongomu ako ini ia malmaling a urvet, na i ranga ve ini vevea ako ile sivengaing i pavurvur aro i vus ol avele.

Aro te sung ler mimiong alavusnga a God imeni.

5 Na i vene mun nge thomu apongare, tho pator mun thomu ve aro o paesu sivengomu a lotu a mukalingare osa thewo. Na thomu alavusnga aro o paruru sivengomu mo o opoal pel, eneke God ile erere i ri vene:

“God i lel ikime nge areko o paroro osivenga, aveto i sung ile themosaling nge areko o paruru osivenga.” *Gutpela Sindaun. 3:34*

6 Maken aro thomu o paruru sivengomu, na o paesu sivengomu a God ile thealing engenga lemi mo aro i paesa thomu roro nge nang ako i ateal i a thomu nge lale.

7 Na matheong alavusnga ako lomumu i voth nge, aro o sungu i a i nge, eneke i theal thomu, na ilemi i voth nge thomu.

8 Naro lomu lemi rumong aro i nine na o thealal, eneke teltunngomua a Satan i esu esa ranga ve ini laion* ako i ngirikal, na i kath toko e ako aro i rereu i mo i ontetu i.

9 Aveto aro thomu o mit engeng nge lomu lemioong nge a Satan imitroalnga, eneke lomumu mire ako titeumu lemioongare ake ru a ulue o el mun sisisong kathnga ako thomu o el mun i.

* 5:8: O thepola laion ia sei nge pes 632.

¹⁰ Na tho nong ve aro God ako ini themosaling alavusnga tepun, ako i lengpot thomu mo aro thomu o el ia malmaling a urvet ako aro ile vusonga avele, ako nge lomu teoong a Krai nge, kene aro i pasenu werer thomu nge ako tova thomu o el tel sisison nge nang pelie, naro i paengeng thomu, na i pamen senu thomu mo o mit engeng inga nge nang elonga.

¹¹ Na ini a God ako ile engenging i voth evelel-nga ako aro ile vusonga avele. I nunganga.

Pita ile malueng patopalalnga.

¹² Na malueng atike tho wat i, Sailas i opoal tho nge. Na tho ate ve ini titeir ako i pesrou avele nge a Toko Pomnga ile omaing omanga. Na nge lek malueng ake tho pator engeng thomu, na tho ekris senu a God ile themosaling nunganga a thomu nge. Maken aro thomu o mit engeng ol nge.

¹³ Na toko lemioongare ako o voth a rem pomnga ake a Babilon o pasungalu ole nang sivenga a thomu nge. Na or ini areko God i ateal or tomo nge thomu mo ini ile. Na Mak ako i ranga ve ini tuk i pasungalu mun ile nang sivenga a thomu nge.

¹⁴ Naro thomu o titpororoling ranga ve ako omu sagu pel.

Na God ile lemi moring aro i voth tomo nge thomu alavusnga ako o teo a Krai nge.

Na i re aken. I vus.

**God Ile Riong Kinnga Ponganga nge
Mangsengre Okei
The New Testament in the Mangseng Language of
Papua New Guinea
Nupela Testamen long tokples Mangseng long Niugini**
copyright © 1999 Wycliffe Bible Translators, Inc.

Language: Mangseng

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-24

PDF generated using Haiola and XeLaTeX on 18 Mar 2025 from source files dated 31 Aug 2023

65e1c726-2893-536b-a159-517869464e50